

Rosetna Martinus, manager di Museo Industrial y di Comunidad

“Museonan di San Nicolas ta habri di dialuna pa diasabra, pasa bishita nan”



MUSEO Industrial ta habri pa pueblo y bishitantenan, inclusive den fin di siman. Esaki ta loke Rosetna Martinus, Manager di Museum of Industry & Community a duna di conoce durante un bishita cu Prome Minister Mike Eman a haci cu Minister di Enseñansa, Cultura y Ciencia di Hulanda, Jet Bussemaker, diabierna ultimo.

Hunto cu su colaboradornan Nyohmi van der Biezen y Mariana Paula, e manager a duna un splicacion na e dos mandatarionan kico tur e Museo ta ofrece na informacion na bishitantenan. Manera ta conoci, Prome Minister Mike Eman recientemente a keda encarga cu Ministerio di Asuntonan di Cultura.

E bishita di e mandatario Hulandes tabata pa e haya informacion di tur e desaroyonan na San Nicolas y e museonan nobo. Asina el a bishita Community Museum, situa na ex Nicolas Store, unda cu el a haya un splicacion di e plannan cu Gobierno tin pa cu e museo aki, cu su apertura lo tuma luga otro aña. Despues a cana

na pia pa yega Museo Industrial, den Watertoren bieu.

E Museo aki tin hopi informacion interesante, brindando un recorrido di tur e industria cu Aruba a conoce den su existencia, cuminsando cu descubrimiento di oro, sigui pa e temporada di aloe, fosfaat, historia di e refinaria y turismo di Aruba.

“Tabata hopi bunita di por a duna tur informacion na e mandatario Hulandes sigur,” sra. Martinus a splica.

E Museo ta habri di dialuna pa diasabra, den siman e ta habri di 9’or di mainta pa 6’or di atardi y diasabra di 10’or di mainta pa 2’or di merdia. Ademas di walk-in, scol of companianan por pidi pa tours, y pa scolnan tin prijs special.

Riba e prome diadomingo di luna e prijs ta “two for one” (5 florin) y riba e dia aki e tema ta “Experience San Nicolas”, unda cu restaurant y galerianan di arte tambe lo ta participando cu eventonan special y e bishitantenan por siña hopi di Aruba y su antepasadonan.

